

Air Greenlandip suliffeqarfissuani soqutigisanut politikki

Air Greenlandip suliffissuani inuiaqatigiinni akisussaaffeqarnerput pimoorupparput. Tamanna aamma Air Greenlandip suliffissuata uatsinnut soqutigisaqartunut attaveqarneratigut ersersinneqarpoq, tassalu; sullitagut, suleqatigut, Kalaallit Nunaanni Namminersorlutik Oqartussat, pilersuisugut, sulliviit suleqatigut, unammillertigut, oqartussaasut, politikkerit, soqutigisaqatigiiffiit, sulisartut peqatigiiffii, tusagassiorfiit inuillu tamat siammasinnerusut.

Soqutigisaqartugut pitsaasumik oqaloqatiginiarlugit ingerlaavartumik tusarnaarlugit ataqqinnillutalu sulivugut. Soqutigisaqartutsinnik suleqateqarnerit tamarmik aqutsinermi tunngavitsinnik FAKIR-imik tunngaveqarput:

- **Faktabaseret** (Pissusiviusunik tunngaveqarneq): Iisimasassanik ujarlertarpugut aammalu pissusiviusut tunngavigalugit aalajangiisarluta
- **Ansvarlighed** (Akisussaassuseqarneq): Atuisumut, taamatullu aningaasanut isumalluutinullu akisussaassuseqarluta sulisarpugut
- **Kommunikation** (Attaveqaqatigiinneq): Saaffigiuminarpugut aammalu ammasumik paasiuminartumillu attaveqaqateqartarpugut
- **Integritet** (Akuuneq): Iliuuseqarsinnaalluta, aalajangersimasunik suliaqarsinnaalluta tatiginartuullutalu takutittarpugut
- **Resultatorienteret** (Angusassanik siunnerfeqarneq): Pimoorussisuuvugut aammalu tamatigut pitsannguinnissaq ujartortarpugut angusassagullu pitsaanerpaatinniartarlugit

Atuisut

Air Greenlandip suliffissuani atuisunut katitikkagut assigiinngissitaartorujussuupput. Tamanna sutigut tamatigut sullitat tamaasa kiffaartuussinnaanissaannut uatsinnut piumasaqaateqarfiuvoq. Kalaallit Nunaat kivitseqataaffigerusupparput aammalu innuttaasut kalaallit ulluinnarni inuunerinut sullitatsinnullu inuussutissarsiormik ingerlataqartorpassuarlut qulakkeereqataarusuppugut. Tamatuma peqatigisaanik pinngortitami najukkatsinnut, kulturitsinnut attaveqaatinullu nunarsuup sinneranut atassusiinitsigut takornarianut misigisassanik pilersitserusuppugut. Atuisut siullertut toqqagassatut isigissagaatigut kissaatigaarput. Taamaattumik tamatigut piareersimasassaagut, aammalu aningaasaqarnermik,

inuiaqatigiinni avatangiisinilu piujuartitsinermik tunngaveqarluta tunisassiatta kiffartuussinittalu ineriartortittuarnissaat pitsanngorsartuarnissaallu sulissutigissavarput.

Atuisutta pisariaqartitaat assigiinngitsut paasisimaaraagut, aammalu atuisutsinnut attaveqaatinik nukittuunik tatiginniffiusunillu pilersitsisarneq ataqqinaatigaarput. Tamanna ilaatigut atuisutta tusarnaarnerisigut, paasissutissiisarnerup annertuneranik qulakkeerisarnitsigut, akisussaaffimmik tiguisarnitsigut aammalu atuisut iluarisimaarinninnissaannik pingaartitsilluinnarnitsigut angusarparput.

1960-imili Air Greenlandip suliffissua kalaallit attaveqaataanni qitiulluinnartumik inissimasimavoq, tamannalu pisussaaffiliivoq. Naleqassutsit, inuiaqatigiinni pilersittakkagut ilisimaaraagut, aammalu tamatigut attavigiuminartuunermut, isumannaallisaanermut, misilittakkanut, eqaatsumik aaqqiisinnaanermut aamma qaffasissumik kiffartuussinnaanermut, taamaalillunilu sullitatta Air Greenlandip suliffissua pillugu pitsaanerpaamik misigisaqarsinnaanerannut qulakkeerisinnaajuarnissarput uagutsinnut pingaaruteqarpoq.

Sulisut

Air Greenlandip suliffissuani sulisut suliffeqarfiup piuneranut tunngaviupput, aammalu sullitatsinnut pitsaanerpaamik sullissisinnaanitsinni pinngitsoorneqarsinnaanatik.

Sulisugut pingaartippagut, aammalu anguniagaqarfiusumik sulisussarsiortarnerit sutigullu tamatigut piginnaaneqarfinnik ineriartortitsinerit aqutigalugit suliffeqarfitta pilerinartuunissaa sulissutigaarput.

Sulisunut politikki, ulluinnarni sulinitsinni aqutsissutigisarput immikkoortillugu allassimavarput, tassanilu akisussaassuseqarnermut, ammasumik pissuseqarnermut akuunermullu tunngavigisagut aallaavigineqarput. Pisortaniit sulisut kattuffiillu taakku ilaasortaaffigisaat ingerlaavartumik oqaloqatigineqartarput, aammalu sulisut isumassarsiuineri akuersaarneqartarput kaammattuutigineqartarlutillu.

Air Greenlandip suliffissuata Kalaallit Nunaanni suliffeqarfinni siullersaalluni whistleblower-imut aaqqissuussineq atuutsilerpaa. Aaqqissuussinermi sulisut, sullitat suliffeqarfiillu suleqatit aterminnik taasinatik nalunaarfissamut kinaassusersiorfiunngitsumut attuumassuteqanngitsumullu suliffissuarmi eqqunngitsuliornerusinnaasut nalunaarutigisinnaavaat.

Kalaallit Nunaanni Namminersorlutik Oqartussat, oqartussaasut politikerillu

Kalaallit Nunaanni Namminersorlutik Oqartussat kisimiillutik Air Greenlandip suliffissuani aktianik pigisaqartuupput, tamatumalu kingunerisaanik Namminersorlutik Oqartussanut piginnittutut taamatullu inuiaqatigiinnut kalaallinut tamarmiusunut ammasumik, akisussaassusilimmik,

akuunermik aammalu pissusiviusut tunngavigalugit paasissutissiisarnermik qaffasissumik atuisoqarnissaa piunasaqaateqarfiuvoq.

Air Greenlandip suliffissuani inuiaqatigiit kalaallit inuussutissarsiutinik ineriartortitsineranni sullissisutut pingaarutilittut immitsinnut isigivugut. Taamaattumik suliffeqarfiup nukittuup unammillersinnaasullu, tamatumalu peqatigisaanik Kalaallit Nunaanni pitsaasumik ineriartortitsineranut tapertaasup pilersinnissaa sulissutigaarput. Taamatuttaaq inuiaqatigiinnut akisussaaffeqarnerput pimoorupparput, ilaatigullu FN-ip Nunarsuarmi Anguniagaanni immikkut toqqakkat aqutugalugit tamanna ingerlapparput.

Namminersorlutik Oqartussat ingerlatseqatigiiffimmik pitsaasumik aqutsinissamut malittarisassiaanni "malinnaagit nassuiaagilluunniit" malipparput, tassanilu malittarisassani allassimasuni ilaatinneqartussaangitsut nassuiaasioorneqarput.

Air Greenlandip suliffissua nunani tamalaani tamanit isiginiarneqartoq, aammalu iliutsigut Kalaallit Nunaannut tamarmiusumut sunniuteqartartut ilisimavarput. Taamaattumik suliffeqarfimmi tunngavitsinnik malinnittuarnissatsinnik, aammalu ingerlatseqatigiiffimmi pissutsit tusagassiuutitigut saqqummiunneqassagaluarpata, tamanna sioqqullugu aktianik piginnittumut ilisimatitserereertarnissatsinnik inuiaqatigiinnut kalaallinut tamarmiusunut akisussaaffeqarpugut.

Air Greenlandip suliffissua suiffeqarfittut pisortanit pigineqartutut, aamma attaveqaatinut pisariaqartunut ilaasutut oqartussaasut politikerillu qanillugit oqaloqatigisarpari. Oqartussaasut politikerillu suliffeqarfitsinnut maleruagassiuussinikkut inatsisiliuussinikkullu sinaakkusersuinissamut akisussaaffeqarnerat ataqqivarput, aammalu ammasumik pilersitsiviusumillu oqaloqatigiittuarnissaq, tassanilu ersarissititsiniarluta paasititsiniarlutalu ikiuunnissarput anguniagaraarput.

Pilersuisut suleqatillu

Air Greenlandip suliffissuani pilersuisunik niuernikkullu attaveqarfinnik allanik suleqateqarnitsinni akisussaassusilimmik, ammasunik, akuuffiusumik sungiussimasumillu sulinitinnik takutitsiuartarnissarput anguniagaraarput. Taamaattumik ukiut ingerlanerini avataaniit suleqaterpassuatsinnut attaveqarnerit nukittuut ataavartullu, illuatungeriinnut iluaqutaasumik annertusarsimavagut.

Pilersuisunut politikkitanni UN Global Compact aallaavigaarput. Taamaattumik inatsisit, taamatullu nunani tamalaani isumaqatigiissutit nalinginnaasut, aammalu ileqqorissaarnissamut, avatangiisinut inooqatigiinnermullu tunngasut malinneqarnissaat piunasaqaatigisarparput.

Unammillertit



Air Greenlandip suliffissua sukkulluunniit niuerfitta immikkoortuini tamani unammilleqatigiinnissamut atugassarititaasut, aammalu inatsisit maleruagassaallu atuuttut malillugit sulivoq. Unammillertigut ilaanneeriarluta aamma sullissinnaasaratsigit suleqatigisinnaasarlugillu eqqumaffigaarput. Taamaattumik piginnittutsinnut, inuiaqatigiinnut kalaallinut aamma/imaluunniit soqutigisaqartunut allanut akornusiisinnaasumik niuerfimmi inissisimaffitsinnik atornerluinnginnissarput mianersuulluartaarput.

Tusagassiorfiit aamma inuit tamat siammasinnerusut

Inunnut tamanut siammasinnerusunut, tassalu sullitatsinnut aammalu piginnittutsitut isigisinnaasatsinnut ammasumik, tikikkuminarluta ersarissumillu pissuseqarnissarput pingaartipparput. Taamaattumik tusagassiorfiit ingerlatitseqqittartutut alapernaarsuisutullu inissisimanagerat akuersaarparput, tamannalu pequtigalugu tusagassiortunut tusagassiorfinnullu qanittumik pissusissamisoortumillu attaveqarnitta ingerlaannarnissaa, aammalu ammasumik unneqqarissumillu oqaloqatiginissaat sapinngisatsinnik pitsaanerpaamik anguniartaarparput.

Tusagassiorfinnut, soqutigisaqatigiiffinnut inunnullu tamanut siammasissunut ilakkuminartumik tikikkuminarlutalu pissuseqartuaannarnissarput anguniagaraarput. Qullersaqarfitta sulisullu attuumassutillit allat tusagassiorfinnut piareersimasarnissaat anguniagaraarput. Taamatuttaaq soqutigisaqatigiiffiit attuumassutillit qanittumik oqaloqatiginissaannut siulliuniarnissarput anguniartaarparput, ingerlatseqatigiiffiup pilersaarutai suaalu pillugit paasissutissiinissaq pisussaaffittut isumaqarfigigatsigu, tamatumalu peqatigisaanik soqutigisaqatigiiffiit tusarnaarnissaannut ilinniarfiginissaannullu pisussaaffeqarluta iluaqutigalugulu isumaqaratta.

Pissusiviusut tunngavigalugit akisussaaffimmik tigusarpugut, ersarissumik attaveqateqartarpugut unneqqarissumillu pissusilersortarluta.

Air Greenlandip siulersuisuinit akuerineqartoq

Nuuk, ulloq 8. september 2020